

Walioandikwa katika Vitabu vya Kumbukumbu vya Mbinguni,

Basi tangu sasa ninyi si wageni wala wapitaji, bali ninyi ni wenyeji pamoja na watakatifu, watu wa nyumbani mwake Mungu. Waefeso 2:19.

Wale wanaojenga uhusiano wa karibu na Mungu wanaweza wasiwe wenye ustawi katika mambo ya maisha haya; wanaweza kuwa wanajaribiwa vikali na kuteseka mara kwa mara. Yusufu alichafuliwa jina na kuteswa kwa sababu aliuitunza uaminifu na uadilifu wake. Daudi, yule mjumbe mteule wa Mungu, aliwindwa na maadui zake waovu kama mnyama wa porini. Danieli, alitupwa katika tundu la simba kwa sababu alikuwa mkweli na asiye kubali kuyumbisha utii wake kwa Mungu. Ayubu alinyang'anywa mali zake za kidunia na mwili wake kuteswa kiasi cha kuwa kinyaa kwa ndugu na rafiki zake, lakini alilinda uadilifu na uaminifu wake kwa Mungu.

Yeremia aliweza kuongea maneno ambayo Mungu aliyaweka kinywani mwake na ushuhuda wake uliokuwa dhahiri ulimkasirisha mfalme na watawala hivyo akatupwa katika shimo la makuruhu. Stefano alipigwa kwa mawe kwa sababu alimhubiri Kristo Aliyesurubiwa. Paulo alifungwa gerezeni, akapigwa viboko, mawe na mwisho aliawa kwa sababu alikuwa mjumbe mwaminifu aliyepeleka injili kwa wamataifa. Yohana mpendwa alifungwa katika kisiwa cha patmo "Kwa ajili ya Neno la Mungu, na ushuhuda wa Yesu."

Mifano hii ya wanadamu waliosimama imara, katika uwezo wa nguvu ya Kiungu, ni ushuhuda kwa ulimwengu unaoshuhudia uaminifu wa Mungu kwa ahadi Zake na uwepo Wake wa kudumu na neema Yake isiyokoma. Ulimwengu unapowatazama wanadamu hawa wanyenyekevu, hauwezi kutambua uadilifu wao kwa Mungu. Ni kazi ya imani kututuliza bila kuwa na wasiwasi kwa Mungu katika wakati wa giza haidhuru tujaribiwe kwa ukali kiasi gani na kusukwasukwa, kuhisi kwamba Baba yetu ndiye ameshika usukani. Jicho la imani pekee ndilo linaweza kutazama ng'ambo ya mambo, muda na kutambua thamani ya utajiri wa milele.

Kamanda mkuu wa jeshi anayapiga mataifa na kutikisa nusu ya majeshi ya ulimwengu, lakini anakufa kwa masikitiko akiwa mateka. Mwanafalsafa anayezunguka ulimwenguni, akifuatilia hali halisi ya nguvu za Mungu na kufurahia upatanifu Wake, mara nyingi anashindwa kutambua maajabu haya makuu ya mkono ulioviumba vyote. "Mwanadamu mwenye heshima na akashindwa kuwa na ufahamu, amefanana na wanyama wapoteao." Hakuna tumaini la utukufu wa kutokufa hapo baadaye kwa maadui wa Mungu.

Lakini kwa wale mashujaa wa imani wanayo ahadi ya urithi wenye thamani kubwa kuliko utajiri wa ulimwengu – urithi utakaotosheleza shauku ya nafsi zao. Wanaweza wasifahamike wala kutambuliwa na ulimwengu, lakini wameandikwa katika vitabu vya kumbukumbu vya mbinguni kama raia wa mbinguni. Umashuhuri mkuu, utukufu mkuu wa milele, utakuwa thawabu ya mwisho kwa wale ambao Mungu amewafanya kuwa warithi wa vitu vyote

(Testmonies for the Church 4:525, 526).